


TEZAUUR LITURGIC
10 NOIEMBRIE

SLUJBA
SF. CUVIOS
ARSENIE HATZIS
DE LA
FARASON-
CAPADOCIA



MOSCOVA, 2000



СЛУЖБА

преподобному отцу нашему Арсению Каппадокийскому

НА ВЕЛИЦЕЙ ВЕЧЕРНИ

Блажен муж: 1-й антифон.

На Господи, возвах: стихирьы, глас 4:

Како ты по достоянию ублажим, / преподобне
отче Арсение, / или киими песньми хвалебными
почтим / многия и великия подвиги твоя, /
елинов похвало и преподобных удобрение, //
чудесы многими от Христа прославленный?
Крест твой взем, преподобне Арсение, / крепко
последовал еси Христу, / нас ради на Кресте
распеншемуся; / и Того ради любве вся оставил
еси, / и Того единого возлюбил еси: / Емуже и со
Ангелы ныне предстоя, // моли ущедрити мир и
спасти души наша.

Светом сияя неприступным, / яко звезда,
просиял еси еллинским людем, / добродетельми
тех просвещая, отче Арсение, / и ныне точиши
благодать исцелений // несомненною душею
приступающим к тебе.

О творящих твою память верно, / преподобне
Арсение, отче всечестне, / и многия подвиги
боголепнаго твоего жития поющих, / не престай

молити Христа сохранить от бед и скорбей // и
будущаго Царствия причастники нас сотворити.

Слава, глас 1:

Отреклся еси плоти Христа ради / и духовный
явился еси народоводитель, / монахов был еси
честное правило / и страсти вся крепко попраал
еси. / Тем и демонов коварство до конца
испепелил еси / и недужным здравие даровал
еси; / к Богу зря всегда, Богоносе Арсение, /
моли грехов оставление даровати // чтущим
любовию святую память твою.

И ныне, Богородичен, глас тойже: Всемирную
славу:

На стиховне стихиры, глас 2:

Пастырскому художеству незлобием обучився, /
отечески паству твою научал еси страху Божию,
/ Арсение, отче блаженне, / образ праведный
жизни в себе явивый, / любовь же милующую
молитвою стяжал еси. / Тем к тебе, яко дивному
угоднику Божию, припадающе, просим: /
молися Господеви / мир миру даровати // и
душам нашим велию милость.

Стих: Честна пред Господем / смерть
преподобных Его.

Ковчег освящения мощей твоих рака явися, /
цвет исцеления испускающи, / и, яко река, из
неяже почерпаем здравие присноживотно, /

приходящий верно, Арсение славне, // в тебе
воистинну чуднаго Бога славяще.

Стих: Блажен муж, бойся Господа, / в заповедех
Его восхощет зело.

Богу от младенства возложен быв / и Тому даже
до конца благоугождая, / отче наш преподобне
Арсение, / дарование зрения душ человеческих
улучил еси / и демонов множество отгнал еси
благодатию. / Сего ради вопием ти, досточудне:
/ моли Христа Бога грехов оставление подати //
чтущим любовью святую память твою.

Слава, глас 6:

Кончину жития твоего на Керкире
предуведевый, / и посещения Богоматери
сподобивыйся, / и по смерти преславныя
чудодействия от Бога точиши, / отче Арсение
присноблаженне. / Но моли за нас, святую
память твою совершающих, / мир нам, падшим,
подати, / житие же наше исправить / и
чертогов Небесных сподобити нас, / по велицей
милости Единого Человеколюбца.

И ныне, Богородичен, глас тойже: Творец и
Избавитель:

Тропарь святому, глас 3:

Житие богоугодное добре скончав, / сосуд
честен Утешителя явился еси, Богоносне
Арсение, / чудес благодать приим, всем

подаеши скорое вспоможение, / отче
преподобне, / Христу Богу молися // даровати
нам велию милость.

НА УТРЕНИ

По 1-м стихословии седален, глас 2:

На земли живя, земная мудрствования презрел
еси, / но, внимая словесем спасительным, / весь
ум твой вперял еси в Горняя, // сего ради и сам
ныне, Арсение, в Горних водворяешися.

Слава, и ныне, Богородичен, глас тойже:
Недоумет всяк язык / достойными Тя ублажити
похвалами, Всесвятая Владычице, / из Твоих бо
ложесн пройде Спас и Избавитель мира.

По 2-м стихословии седален, глас 5:

Страстей тьмы отбег, / к безстрастия пути
наставляемъ, / к Свету невечернему востекл еси,
Арсение преподобне, / и, от Сего озарився, /
нетления богатство наследовал еси. // Моли
непрестанно о всех нас.

Слава, и ныне, Богородичен, глас тойже:
Души моя ленью лютую / и сердца моего
неможение, / Мати Божия Пречистая, /
воззревши, исцели молитвами Твоими / и
спасенных части сподоби, / избавляющи мя

тьмы и мучения, // яко Еди́на уповање мое и
утешение.

По полиелее седален, глас 8:

Вдобродетелех, яко финикс, процвел еси, / и
теми людем послужил еси, / окормляя и умудряя
паству твою, отче Арсение. / Сего ради святыя
мощи твоя / чудесы прослави Христос Бог наш,
/ Егоже моли, преподобне, / согрешением
оставление даровати // чтущим любовь
святую память твою.

Слава, и ныне, Богородичен:

Богородице Дево, / Вседержавная наша Царице,
/ омофором молитв Твоих покрывающая весь
мир, / прими от благодарных сердец наших /
похвальныя песни сия / и испроси нам у Сына
Твоего Спаса нашего // грехов прощение и
велию милость.

Таже степенна, 1-й антифон 4-го гласа.

Прокимен, глас 4:

Честна пред Господем смерть преподобных Его.
Стих: Что воздам Господеви о всех, яже воздаде
ми?

Всякое дыхание:

Евангелие от Матфея, зачало 43.

По 50-м псалме стихира самогласна, глас 6:
Средь мира пожил еси, / но выше всех мирских
быв, / сего ради и чистая твоя душа, /
правоверием блистаючи явися, / озаряет
верных исполнение, / бесовское же омрачение
отгоняючи / от приходящих тебе с верою. / Тем
яко причастника благодати / воистинну тя
ублажаем, Арсение досточудне, // Христа Бога
моли от бед спасти рабы твоя.

Канон святому, глас 2.

Песнь 1

Ирмос: Грядите, людие, / поим песнь Христу
Богу, / раздельшему море, / и наставльшему
люди, яже изведе из работы египетския, / яко
прославися.

Припев: Преподобне отче Арсение, моли Бога о
нас.

Умом очищенным преславно зриши, Арсение
преподобне, доброту неизреченную - Христа,
всяческих Бога нашего, Егоже моли достойно
воспети подвиги твоя.

Якоже Илия на колеснице, отче Арсение,
добродетельми твоими возшел еси на Небо и
тамо чисте зриши Святую Троицу, к Ней же
духом горя и возлетая.

Вседержителю Престолу предстоиши, мудре,

яко изрядный воин, подобяся своему Владыце,
Егоже от юности вождедел еси, и был еси
Ангелом собеседник и праведным единокитель,
Арсение всеблаженне.

Богородичен: Светлыми благодати лучами
Твоего Сына, Богородице, просвети омраченную
мою душу, страстей смущение отжени, Твоими,
Чистая, ходатайствы.

Песнь 3

Ирмос: На камени мя веры утвердив, /
разширил еси уста моя на враги моя. /
Возвесели бо ся дух мой, вегда пети: / несть
свят, якоже Бог наш, / и несть праведен паче
Тебе, Господи.

Благими нравы украсився, Христу прилепился
еси от юности, плотския страсти умертвив
воздержанием, и к Жизни нестареющей,
преподобне, преставился еси.

Кроткому и смиренному сердцем Господу Иисусу
подражая, смирен мудрованием, кроток и
послушлив ты был еси, от Негоже и благодать
тебе, Арсение, даровася.

Людем каподокийским, яко богозарный
светильник, возсиял еси, Арсение,
добродетельми: подвизи бо и труды твоя
световидна и славна тя сотвориша.

Богородичен: Оружие, прогоняющее грехи и страсти души моя буди, Дево, и покажи мя, якоже другой рай, безнаветен и соблюден Тобою и приносящий цветы Духа.

Седален, глас 3:

Словесами евангельскими озаряемь, / в пути, ведущий к жизни, Божественным сиянием ходив верно, / вражиих отбег прилогов, / сын света и дне явился еси, // Арсение Богоблаженне.

Слава, и ныне, Богородичен:

Пречистеи Твои руце, Дево Мати, простерши, / покрый уповающия на Тя и к Сыну Твоему зовущия: // всем подаждь, Христе, Твою милость.

Песнь 4

Ирмос: Пришел еси от Девы, / не ходатай, ни Ангел, / но Сам, Господи, воплощся, / и спасл еси всего мя человека. / Тем зову Ти: / слава силе Твоей, Господи.

Агнца Божия закалаемаго за грех всего мира зрел еси сердечными очима, отче, священную Евхаристию совершающе, таже и ныне воздержи твои праведнии руцы к Престолу Божию за люди твоя, тя почитающих.

Отец преискренний показался еси, отче

Арсение, пастве твоей, любовь свою согревающий сердца чад твоих.

Господень возследователь явился еси и апостольскаго духа приятелище, отче досточудне, не остави нас, благодарне о тебе Богу поющих.

Богородичен: Возсия из утробы Твоея, Отроковице Неискусобрачная, Отчее сияние — Христос, и просвети вселенную и бесовскую тьму потреби ешь.

Песнь 5

Ирмос: Света подателю и веков Творче, Господи, / во свете Твоих повелений настави нас; / разве бо Тебе иного бога не знаем.

Душу твою храм Святаго Духа соделав, преславне Арсение, был еси наследник Горняго Царствия, с Вышними чинами водворяяся, всечестне отче.

Естеством кроток и милостив, не остави нас, на твоя молитвы уповающих и молящихся тебе, покрый нас, отче, от навет вражиих святыми твоими молитвами и пути наша направи.

Образ добродетелей был еси пастве твоей, Богосвещенный наставниче наш Арсение, от всякия злыя вещи удален: яко да избавиши нас от соблазна, преткновения и кознодейства вражия.

Богородичен: Закона исполнение, высшая
Херувим, родила еси Божия Слова воплощена,
Сына Единородна, Егоже о рабех Твоих умоли.

Песнь 6

Ирмос: В бездне греховней валяясь, /
неизследную милосердия Твоего / призываю
бездну: / от тли, Боже, мя возведи.

Естество ангельское удивил еси, отче Арсение,
телесными подвиги твоими и любовью к Богу
пламенеющею, еяже ради источник
неоскудевающий чудес яви тя Господь людем
Своим.

Образ был еси верным: словом, житием,
любовию, сего ради вселися в тя Дух Святый,
отче Богоносе, и нам помолися стяжати
благодать Того.

Истине Евангельской с детства наученный,
животворныя заповеди Спасовы исполнил еси
ревностно, отче Арсение, и явился еси
проповедник деятельный пути спасительнаго.
Предведый Бог, отче Арсение, твоей души
красоту и разума чистоту,
священнопроповедника мудра людем показа тя.
Богородичен: Милости Твоея, Богородице,
сподоби мя, премилостиваго Слова рождшая,
Своею Кровию от тли человеки избавльшаго.

Кондак, глас 4:

Каппадокии новосажденный цвет / и
добродетелей многочестный сосуд, / святого
Арсения воспоим, / сей бо яко Ангел во плоти
жительствовав, / сожитель бысть всем святым, /
с ними же предстоит всегда Христу // и молится
даровати нам согрешений прощение.

Икос:

Свидетель истинный и твердый Евангелия
Христова / явился еси, славне отче Арсение, /
агарянское безумство тихостию нрава посрамил
еси, / чудеса многоразличными веру
православную в людех утверждая, /
малодушныя словесы Божественными утешая, /
всех ко Христу приводя; / тако и нас не лиши
твоего заступления, / почитающих память твою
верно // и молися даровати нам согрешений
прощение.

Песнь 7

Ирмос: Да преславное рождество Твое, Христе, /
еже от Девы прообразиши яве, / неопалимы в
пещи отроки сохранил еси, / песнями поющыя
Тебе: / отцев Боже, благословен еси.
Повеления отеческая храня невредимо,
правоверным смыслом, ты от юности имел еси
житие чисто и милостивен нрав, Арсение

досточудне и ко Творцу всех взывал еси: отцев Боже, благословен еси.

Божиим мановением роду нашему явлены быша честныя мощи твоя, отче Арсение, ихже преподобный Паисий на Керкире обрете, сего ради освящение приемлем, Христу вопиюще: отцев Боже, благословен еси.

Трудолюбный делатель молитвы показался еси, отче Арсение, службы церковныя усердно совершая и люди пети научая: отцев Боже, благословен еси.

Богородичен: Радуйся, Владычице Дево, яко всем людям похвала еси, непрестанно молися Христу Богу сохранить гред сей и люди молитвами всеблаженнаго Арсения.

Песнь 8

Ирмос: В печь огненную ко отроком еврейским снизшедшаго, и пламень в росу преложшаго Бога, пойте дела яко Господа, и превозносите во вся веки.

Отец чадолюбивый был еси всем приходящим к тебе со скорбию сердечною и нуждою, и никтоже неутешен отыде от твоего лица, блаженне.

Священныя мощи твоя, обогащияся дивными чудесы, проповедают небесную славу твою, и милости твоя явленныя роду нашему понуждают

звати: благословите Христа во веки.

К тебе, отче Арсение, припадающе, умиленным гласом вопием: посети немощи наша, буди ходатай о нас, тебе ради благословящих Христа во веки.

Ангелом сомолитвенниче, отче Арсение, священнодействуя праведно, ты сердцем чистым Господа зряще и телесными очима на Престоле Агнца Божия за мир закалаема видяще, Вседержителю зывал еси: Господа пойте дела и превозносите во вся веки.

Богородичен: Бога нам родила еси, Пречистая Богорадованная Дево, спаси место сие и люди, на Тя уповающия, Богородице Пренепорочная и Сыну Твоему вопиющия: благословите Христа во веки.

Песнь 9

Ирмос: Безначальна Родителя Сын, Бог и Господь, воплощься от Девы нам явися, омраченная просветити, собрати расточенная: тем всепетую Богородицу величаем.

В печали, отче, оставил еси Боголюбезная твоя чада, в радость же душевную претворил еси верных множества явлением благовонных мощей твоих. Темже и похвальная тебе приносим, Христа величающе.

Красно убо Церковь веселится в памяти твоей, о

пастырю дивный отче Арсение! Вернии же людие стекаются, празднственная тебе приносяще, восхваляюще Христа, тебе прославльшаго.

Обрати свой взор с превыспренних высот на нас, в памяти твоей ликующих и Христа славословящих, и отеческим твоим благословением осени всех, пастырю священнейший Арсение.

Весь во Свет Божественная Троицы с веселием прешел еси, ангельским воинством ныне срадуешися, пречудне отче Арсение, с нимиже непрестанно моли всем спастися, поющим тя. Богородичен: Юже воспевают Силы Небесныя, Владычицу Деву, Церкви красоту, верных державу и похвалу, благодарно величаю и пение скончаваю.

Светилен:

Светом Превечнаго сияния озарився, отче Арсение, Христу последовал еси, и Того благодатию просветився, источник чудес и милостей явился еси, сего ради молим тя: спаси души наша.

Слава, и ныне, Богородичен: Зарю пресветлую, являющую нам Солнце незаходимое, вемы, Тя, Пресвятая Дево Богородице. Сего ради молим Тя: яко Мати

Света сущи, просвети нас светом Сына Твоего, Христа Бога нашего.

На хвалитех стихиры, глас 4:

Мудростию украшаяся и разумом просвещаяся,
/ смирением сердца красуюся, / и высотой
жития, досточудне, / в разумныя дворы вшел
еси, // идеже нас поминай, чтущих тя, Арсение
блаженне.

Свет лица твоего, отче, / проявляет твою
духовную благодать, / красен быв ко видению, /
паче же краснейший душею, / твоя бо мощи
облагоухают чувства, и удивляют всяк разум, /
и прославляют Бога, прославльшаго тя, // отче
наш Арсение.

Имел еси, отче, душу милостиву, / и чист
помысл, и сердце нестропотно, / и веру
нескверную, и любовь нелицемерную. / Темже
почитаем тя, Арсение, священными песньми //
и благочестно вси ублажаем и восхваляем.

Якоже некогда Илия Фесвитянин / милоть свою
Елисею оставль, / знаменуя благодати
присвоение, / такожде и ты, Арсение святе, /
приемника благодати твоя определяв, /
предзрелеси духовными очесы твоими / дивнаго
старца Паисия житие. // Сего ради мы любовию
вас почитаем.

Слава, глас 8:

Возликовствуем, вернии, / и песни хвалебныя
принесем Христу Богу, / даровавшему нам
дивных пастырей своих: / Арсения
достоблаженного и всечестнаго Паисия, /
просвещающих верных сердца светом
благоразумия // и молящихся о душах наших.

И ныне, глас тойже:

Владычице, прими молитвы раб Твоих / и
избави нас // от всякия нужды и печали.

НА ЛИТУРГИИ

Блаженна от канона песнь 3-я и 6-я.

Прокимен, глас 7: Честна пред Господем /
смерть преподобных Его.

Стих: Что воздам Господевио всех, яже воздаде
ми?

Апостол к Галатом, зачало 213.

Аллилуиа, глас 4: Праведник, яко финикс,
процветет, / яко кедр, иже в Ливане,
умножится.

Стих: Насаждени в дому Господни во дворех
Бога нашего процветут.

Евангелие от Луки, зачало 24.

Причастен: В память вечную будет праведник:

[К приближающейся памяти преподобного Арсения Каппадокийского (28 октября / 10 ноября) выкладываю в «Уставные заметки» иную службу ему, составленную клириком Одесской епархии Украинской Православной Церкви **протоиереем Илией Тетерько.**]

